



天津交通銀行同  
人俱樂部圖書室



左文襄公奏稿卷四

起同治二年癸亥正月訖二月

目錄

連克湯溪龍游蘭谿三縣并金華府城生擒首逆摺

請將總兵高連陞仍畱浙營片

查辦浙省失事各員分別定擬摺

甄別道員廳縣摺

遴員請補要缺知府摺

連復武義永康等縣城見籌布置情形摺

瀝陳餉項支絀片

請將知府楊昌濬開缺以道員用片

奏稿卷四目錄

審辦龍游首逆片

克復紹興桐廬府縣城池摺

瀝陳浙省殘黎困敝情形片

浙江初次米捐援例請獎摺

請將初次米捐照常覈獎片

水陸各軍攻勦大勝見籌辦理情形摺

請調京員并多掣本年卽用知縣來浙片

查明紹興蕭山克復詳細情形摺

查明法國參將陣亡請卹摺

甯波新關經費請作正開銷摺



另設夾板巡船經費請於洋稅項下開銷片  
請 敕江蘇道員郭嵩燾督辦松所鹽務片  
遵保克復嚴郡出力弁兵紳勇摺  
請 賞還已革臬司原品頂帶片

奏稿卷四目錄

連克湯溪龍游蘭谿三縣并金華府城生擒首逆摺

同治二年正月十五日會銜

奏爲官軍連克湯溪龍游蘭谿縣城金華府城生擒首逆恭摺馳

奏仰祈

聖鑒事竊湯溪踞逆經官軍圍日久窘蹙益甚蔣益澧於城外加掘重濠屢次擊敗金華援賊時復射示城中曉以禍福賊目僞朝將彭禹蘭遂於正月初九日遣人詣蔣益澧軍前乞降蔣益澧隨令副將劉樹元守備徐文秀軍功李世祥等至城邊密與之約彭禹蘭於初十日亥刻甫將僞忠裨天將李尙揚僞瀛天義張公慶喻天義劉明榮慈天義李加斌等賊目八名誘至濠邊劉樹元徐文秀等出其不意擒解回營蔣益澧見巨愍就縛比夜飛飭各

奏稿卷四

一

營分攻城壘自率親兵於西門策應并約督臣所派助剿之道銜知府康國器率閩軍攻南門彭禹蘭見官軍大至疾啟西門徐文秀匹馬衝入劉清亮曹魁甲周廷瑞賀國輝王東林率所部繼之槍礮齊施刀矛并舉該逆無路奔逃併力巷戰約一時許斃賊三千餘名適余朝貴丁賢發亦率所部梯城而入遇賊卽殺又斃賊二千餘名城各處火起賊屍枕藉號哭聲聞數里各悍賊奪門出走自相蹂藉死者不知其數間有跳越重濠者經高連陞謝永祜楊道洽各率所部截殺康國器復督粵軍於南門擊之又斃賊四千餘而城中之賊盡矣其東門壘中之賊見城破火起卽棄壘驚竄亦被高連陞等分途截殺淨盡登將城壘攻克時已天明蔣

益澧飭高連陞熊建益卽率各營乘勝進擊援賊逆首偽戴王黃呈忠僞首王范汝增僞梯王練業坤等正思逃竄見官軍大隊擁至紛向白龍橋金華府一帶狂奔高連陞熊建益督各營乘勢掩殺斃賊二千餘名搜斬各村餘逆數百名自酤坊開化村至白龍橋等處賊壘數十座一律焚燬奪獲輜重器械軍火馬匹偽印不計其數此十一日克復湯溪縣城首逆就擒并追剿援賊大獲全勝之實在情形也龍游踞逆負隅不出已久官軍大小槍礮偪轟晝夜不息仍忍飢頑踞如故除夕四更微雨初止有賊數千突出撲東門官軍噴筒火箭併射營壘劉培元飭官軍憑壘轟擊斃賊約數百名侵曉仍遁伏舊巢元日馬德順率馬隊巡哨至城東南

奏稿卷四

五峰廟殺掠食之賊數十生擒二十八名以歸嗣是駐營湖鎮之崔大光駐營張家埠之劉光明余萃隆等皆日有擒斬難民之藉挑食野菜逃出者日以數十計臣知城賊將遁矣初九日江西撫臣所派助剿之道員王德榜憤請率所部再於城南移築三小壘臣偪之臣會商劉培元并飭各營列隊以待賊意官軍盡趨東南忽出悍黨千餘撲西路營壘參將余佩玉督新練温州勇丁奮擊斃賊約數百名劉明燈張人和劉明珍等亦各率所部衝殺賊敗入城官軍於其入城之時開放劈山礮轟斃紅衣騎馬賊目數名是夜城中賊自相鬪人聲鼎沸初十一兩日城賊昇其輜重出屯城外壘中諸營皆知其竄必速訶察益嚴臣復射示城中諭以

湯溪已克李尙揚已擒之故十二日酉刻賊乘月色晶澈居然啟東門向湯溪大路竄赴金華蓋猶不信湯溪之已克也臣與劉培元先已派定水陸馬步各營分路截擊玆胤蔣益禮康國器等整軍以待是時劉培元王德榜陳希祥賴錫光劉榮合毛正道賴長等各率所部入城壘將餘逆剿盡一面整隊跟追城中賊目壘天燕張可成蔡廣元率黨千餘款營乞降楊和貴受之仍派隊追剿賊之前隊竄及張家埠劉光明李世顏橫出截之水師礮聲齊震賊迅竄湖鎮崔大光余萃隆橫出截之劉培元復督所部劉明珠梁雲山黃本富及鍾南英劉明燈楊和貴張人和簡桂林各營與馬德順馬隊繼之楊昌濬虞紹南李光瑩許瑤光余佩玉率臣

奏稿卷四

三

標親兵營旂傍向遂昌一路搜剿而進賊且拒且走官軍或遮其前或躡其後或撓其旁層疊截殺自東門至湯溪一路中間山谷坡陀賊屍駢列斃賊約近萬餘沿途棄械逃散及難民乘機逃去者不知其數陣斬首逆陳廷香李國羣獲其偽印偽令與其眷屬是夜自酉刻至十三日卯刻追近湯溪縣城蔣益禮康國器早率所部挺矛以待賊至卽擊又斃數千迨過湯溪大路以趨金華餘賊無幾高連陞熊建益是日辰刻已克復金華府城復派隊邀之鮮有脫者頃據劉培元馬德順鍾南英追賊至金華凱旋面告據生擒賊供賊目李學金羅萬友梁雲摩已經高連陞擒獲臣已飭其查覆若果如此則龍游一城五壘之賊無一漏網者矣奪獲軍

械旂幟偽印馬匹不可數計此十二日克復龍游縣城之實在情形也蘭谿之賊經劉典擊敗後先已分竄浦江城賊無多惟馬公嘴谿西兩堅壘仍負固以拒官軍聞湯溪破十二日分兩路逃走劉典飭黃少春李耀南黃有功楊芳桂率各營及羅啟勇水師會同蔣益澧所派各營追剿斬賊數百名是夜劉典復飭各營跟追三十餘里又斃賊五六百名解散者不計其數奪獲輜重軍火甚多此十二日同時克復蘭谿縣城之實在情形也臣見三城已復正擬南取永康武義北取浦江爲進擣金華之計適接蔣益澧飛函報稱十二日高連陞熊建益督率十一營旂進紮白龍橋賊首黃呈忠等恐怖殊甚急思奪路他竄金華府城踞逆劉政宏見黃呈忠等遁走率黨由東門逃竄高連陞熊建益等乘勢奪門而入殺賊約二千餘名立將府城克復金華府城最得地勢城垣堅固異常考歷代浙中兵事均以此爲關鍵攻取之難十倍他郡此次乘勝而克實非愚臣意料所到此皆仰仗

奏稿卷四

四

皇上天威諸文武將士殫忱竭力得以迅速奏功浙事轉機或在於此其李尙揚一犯自道光二十九年卽入粵西會匪與賊首蕭朝貴李來芳李世賢等爲死黨僞官至忠禪天將所部老賊多至十數萬巨逆李世賢赴溧陽倚其固守金華爲老巢密屬其以龍蘭湯三城爲犄角嚴處爲爪牙力抗大軍者也臣於提訊後召集各將士數其罪狀磔之人心稱快此次三日之內連克府縣四堅

城在事文武均屬著有微勞布政使蔣益澧功績卓著應請旨交部從優議敘或懇

天恩頒賞物件以示優異廣西左江鎮總兵高連陞應請以提督交軍機處記名遇缺題奏副將熊建益應請以總兵記名簡放署衢州鎮總兵劉培元應請

賞給勇號并加提督銜己革按察使銜花翎卽選道王德榜應請開復革職處分畱於浙江補用并

賞給該員父母二品封典道銜江西補用知府康國器應請以道員仍歸江西儘先補用其餘在事員弁兵勇實在出力者甚多可否由臣查明彙保出自

奏稿卷四

五

恩施所有克復湯溪龍游蘭谿縣城金華府城緣由謹會同協辦大學士兩江總督臣曾國藩閩浙總督臣耆齡恭摺馳奏伏乞

皇上聖鑒施行謹 奏

同治二年二月初一日內閣奉

上諭左宗棠奏攻克湯溪龍游蘭谿三縣及金華府城一摺與本日耆齡所奏情形大略相同浙江金華踞逆恃湯溪龍游蘭谿爲犄角官軍圍攻湯溪壘次擊敗逆勢窮蹙正月初十日藩司蔣益澧密約投降賊目彭禹蘭內應將僞忠裨天將李尙揚等賊目八名誘擒旋啟西門官軍衝入該逆無路奔逃巷戰逾時先後斃賊五千餘名其奪門越濠逃出者復經知府康國器擊斃四千

餘名城中之賊殲除殆盡當將湯溪縣城克復城外賊壘同時攻克援賊向金華一帶狂奔總兵高連陞等督軍乘勢掩殺斃賊二千餘名自酤坊開化村至白龍橋等處賊壘數十座一律焚燬龍游之賊屢經官軍擊敗初九日忽出悍賊千餘名圖撲官軍營壘參將余佩玉等督軍奮擊斃賊數百名餘賊敗入城中十二日賊開東門向湯溪大路竄赴金華總兵劉培元一面攻復城池搜捕餘逆賊目張可成等率黨千餘名款營乞降一面派隊追剿竄賊沿途截殺斃賊約近萬餘名十三日追近湯溪復經蔣益澧等擊斃數千名餘賊得免者無幾蘭谿之賊先經臬司劉典擊敗其勢已孤十二日分兩路逃走劉典派兵追剿先後斃賊千餘名當將

奏稿卷四

六

蘭谿縣城克復金華府城踞逆劉政宏見官軍進紮白龍橋遂於十二日率黨由東門逃竄高連陞等乘勢奪門而入殺賊二千餘名立將金華府城克復金華等處逆賊負隅已久此次官軍連克四城生擒首逆洵足以塞賊膽而快人心左宗棠調度有方深堪嘉尚仍著督飭各軍節節進剿盡殲醜類浙江布政使蔣益澧戰功卓著著賞給小卷江綢袍料一件江綢馬褂料一件白玉翎管一枝白玉搬指一箇大荷包一對小荷包兩箇并交部從優議敘其尤爲出力之總兵高連陞著以提督交軍機處記名遇缺題奏副將熊建益著以總兵記名簡放署總兵劉培元著賞給銳勇巴圖魯名號并賞加提督銜已革按察使銜卽選道王德榜著開復

革職處分畱於浙江補用并賞給該員父母二品封典知府康國  
器著以道員仍歸江西儘先補用其餘在事出力員弁兵勇著左  
宗棠查明保奏者齡另摺奏把總鄔勝高儘先外委周進鏐勦賊  
陣亡深堪憫惻著交部從優議卹該部知道欽此

奏稿卷四

議政王軍機大臣字寄同治二年二月初一日奉

上諭左宗棠奏攻克湯溪等縣并金華府城生擒首逆者齡奏克復湯溪等三縣城池各摺片湯溪龍游之賊被圍日久勢極窮蹙經官軍於正月十一十二兩日將該二縣城池先後攻克生擒首逆李尙揚等正法逆黨殲戮無遺其蘭谿金華兩城之賊聞風畏懼棄城逃竄亦經官軍截殺甚多於十二日同時將城池克復覽奏曷勝欣慰金華等府縣四城地踞上游最爲扼要且爲大股賊匪屯聚之所見已同時攻拔賊之精銳亦爲官軍殲盡下游杭紹諸逆亦必聞而喪膽耆齡左宗棠務當乘此破竹之勢會督閩浙諸軍星夜進擣杭州爲一鼓殲除之計一面分軍規取永康武義以清後路并著嚴飭浙東兵勇迅速攻拔紹郡及所屬各縣城以期節節進剿爲四面合圍杭城之舉毋稍延誤左宗棠所保出力之蔣益澧等本日已明降諭旨均照所請給予獎敘矣將此由六百里各諭令知之欽此

請將總兵高連陞仍畱浙營片

同治二年正月十五日

再記名總兵高連陞向隨蔣益澧出師粵西屢立戰功擢保今職前恭閱邸鈔同治元年八月二十六日奉

上諭廣西左江鎮總兵著高連陞補授欽此伏查高連陞自隨蔣益澧抵浙以來克復壽昌湯溪金華三城樸誠奮勇實爲將領中不可多得之員見值浙省軍務方殷需材孔亟請

旨仍畱浙江軍營隨同蔣益澧剿賊以資得力俟浙江全境肅清再請

旨陞見馳赴新任理合附片具陳伏乞

聖鑒施行謹 奏

奏稿卷四

九

議政王軍機大臣奉

旨著照所請欽此

查辦浙省失事各員分別定擬摺

同治二年正月十五日

奏爲浙省失事應行查辦文武各員先行分別定擬具奏仰祈  
聖鑒事竊維浙省此次被擾殆徧各郡縣或被匪久踞或曾經竄  
擾所有失事地方各員自應一律查辦除未經投到各員容俟查  
明辦理外其已經來衢投到者理合先行分別定擬據代辦藩司  
蘇式敬臬司劉典逐一研訊取具各該員親供詳勘前來<sub>臣</sub>復加  
意察核謹酌其情罪重輕分別定擬開單恭呈

御覽伏候

訓示施行謹 奏

同治二年二月初一日內閣奉

奏稿卷四

十

上諭左宗棠奏浙江失事應行查辦文武各員先行分別定擬開  
單呈覽一摺浙江各府縣或被賊久踞或曾經竄擾該地方失事  
各員均應一律查辦見經該撫訊明已革署杭嘉湖道劉齊昂雖  
無帶兵專轄之責惟杭州省城陷後展轉偷生難從末減已革金  
華府王桐於賊匪未至之先業經到任兩月該府城堅固易守如  
果布置嚴密何至一攻卽陷雖因兵單失守該革員亦曾受重傷  
究屬罪無可追劉齊昂王桐均著發往新疆充當苦差已革副將  
余永椿雖無聞警先逃情事惟打仗不力屢次挫退著發往軍臺  
效力贖罪革職畱任署於潛縣知縣包容該縣本無城郭杭城旣  
陷勢實難支第責重守土咎無可辭著革任發往軍臺前署安吉

縣知縣周冕委署在兩次失守之後又無防兵力難堵禦至據稱失守之時係奉調晉省實屬意圖掩飾前署新昌縣知縣楊詩益該縣本無防兵賊至時尚無棄城先逃之前事署海甯縣知縣黎定攀於縣城失守實因眾寡不敵所致前署雲和縣知縣柯沅該縣本無城池致被闖入前代理龍游縣知縣衢州府經歷朱毓榮委代在失守之後城中又無官兵駐守失陷情節尙輕惟以上五員均有守土之責豈可稍涉寬縱周冕楊詩益黎定攀柯沅朱毓榮均著革職發往軍臺前署金華府知府徐慮善於失事本案情節最輕惟府印被搶實屬咎有應得著革職毋庸畱營效力該部知道單併發欽此

奏稿卷四

甄別道員廳縣摺

同治二年正月十五日會銜

奏爲甄別道員廳縣請

旨分別勒休革職以肅吏治事竊維戡亂之道在修軍政尤在飭吏事軍政者弭亂之已形吏事者弭亂之未發也用人之道重才具尤重心術才具者政事所由濟心術者習尚所由成也浙江吏事因循廢弛已久故大亂隨之紳輕其官民疾視其長上上無嘉德下有違心馴致盜賊縱橫莫能遏抑臣自提軍入浙目覩殘民疾苦情形無日不痛心疾首深維致亂之原於屬吏之庸鄙猥詐者實不覺恨之深而繩之峻除有別案應行劾治容俟訊明辦理外查見任溫處道支方廉年老才庸難膺表率之任應請

奏稿卷四

三

旨勒令休致署玉環廳同知白讓卿年力衰頹昏鄙不職署常山縣知縣王蘭貌似有才心殊狡詐開化縣知縣曹建春庸懦糊塗不堪造就試用知縣江允中輕佻放縱有玷官箴先用知縣劉心濂性情狡猾工於作僞升用知縣候補縣丞王恩溥性情乖謬嗜好甚多應請

旨一併革職永不敘用謹會同閩浙總督臣耆齡恭摺具奏伏候聖鑒訓示施行謹 奏

同治二年二月初一日內閣奉

上諭左宗棠奏甄別道員廳縣請分別勒休革職一摺浙江溫處道支方廉年老才庸難膺表率之任著勒令休致署玉環廳同知

白讓卿年力衰頹昏鄙不職署常山縣知縣王蘭貌似有才心殊狡詐開化縣知縣曹建春庸懦糊塗不堪造就試用知縣江允中輕佻放縱有玷官箴先用知縣劉心濂性情狡猾工於作僞升用知縣侯補縣丞王恩溥性情乖謬嗜好甚多著一併革職永不敘用以肅吏治欽此

奏稿卷四

遴員請補要缺知府摺同治二年正月十五日會銜

奏爲遴員請補要缺知府以資治理仰祈

聖鑒事竊照温州府知府志勳前年在洋遇盜被害所出之缺已隨摺聲明由外遴員請補在案伏查温州地處海濱匪盜充斥自前年會匪滋擾之後士習民風日趨險詐非廉幹之員不足以資化導而振紀綱臣於通省知府內逐加遴選非例應查辦卽人地未宜惟道銜候補知府周開錫見年三十七歲係湖南益陽縣監生成豐五年經前湖北巡撫臣胡林翼調赴軍營差遣歷經胡林翼李續宜會國藩保奏以知府補用

賞戴花翎上年二月臣奏調來浙酌量請補奉

奏稿卷四

西

旨俞允八月克復遂安援剿江山衢州等處彙保案內奏請

賞加道銜嗣在江西河口辦理釐務亦有成效見飭赴温州督辦官鹽釐稅事務臣查周開錫廉介勤能深知政體以之補授温州府知府實堪勝任合無仰懇

天恩俯准以周開錫補授斯缺并俟軍務完竣補行送部引

見俾臣得收指臂之助再溫處道支方廉經臣奏請勒休所有員缺應卽飭周開錫兼署并請另行

簡放以重職守謹會同閩浙總督臣耆齡恭摺具奏伏乞

皇上聖鑒施行謹 奏

議政王軍機大臣奉

旨吏部議奏欽此

奏稿卷四

五

連復武義永康等縣城見籌布置情形摺

同治二年正月二十七日會銜

奏爲官軍連復武義永康東陽義烏浦江諸暨等縣城見籌布置情形恭摺馳奏仰祈

聖鑒事竊龍游湯溪蘭谿金華等城經官軍攻克後金華賊與

首梯戴三逆由義烏竄赴諸暨譚星率蘭谿敗賊竄赴浦江

臣比

飭蔣益澧分軍由武義永康義烏進剿劉典由浦江進剿合攻諸

暨適據督

臣

調攻武義之總兵林文察署永康縣知縣程陶成馳

報武義永康之賊於十三日同時遁走林文察督軍追殺當復武

義程陶成率圍收復永康復據探報東陽義烏之賊亦聞風向諸

暨一帶潰竄劉典急率各營進逼浦江該處踞逆正思逃走十八

奏稿卷四

六

日劉璈黃少春等率所部馳至斬殺數百名追至離城五十里之  
白馬橋始收隊還當將縣城收復劉典卽飭各營乘勢逼攻諸暨  
黃少春黃有功李耀南喻可宗楊芳桂率所部由脾頭以攻諸暨  
之南劉璈朱明亮齊蘭禮率所部由草塔以截賊出路該處民團  
見官軍至無不踴躍爭先願爲前導二十二日四更黃少春等督  
隊行至距城二十里地方出賊不意擊之擒斬數百賊敗入城官  
軍齊抵城下民團復於四面喊殺奮力圍攻城賊千餘驚慌無措  
遣人詣黃少春等軍前乞降黃少春等受之二十三日遂率官軍  
團勇入城當將縣城收復其投誠之賊經劉典飭令薙髮遣散歸  
籍見據各路稟報金華敗賊與首梯戴三逆竄赴諸暨後聞官軍

將至復向義橋竄遁其意在回竄杭州可知諸暨逸匪聞已回竄紹興蓋自龍游湯溪蘭谿金華四堅城破後羣賊喪膽一聞官軍躡蹤追至卽奪路狂奔足無停趾惜前途無兵阻截未能聚而殲旃其粵賊譚星一股由浦江敗竄聞爲李秀成之黨所阻不敢回竄杭州見已竄近桐廬臣已飭蔣益澧一軍乘勢進攻紹興劉培元率所部水師順流而下會魏喻義所部合擊桐廬之賊遏其西趨臣已移軍蘭谿俟將金華等處布置稍定卽親赴嚴州調度一切其劉典一軍仍須由嚴赴徽爲肅清皖南之計必俟皖南局勢漸定江皖邊圍又安然後臣軍無後路之虞方可壹意進取至督臣派來援剿之康國器一軍及閩粵各軍臣已函商督臣飭其暫

奏稿卷四

七

駐東陽縉雲一帶以壯蔣益澧後路聲援暫緩前進因見當進攻紹興之際甯波之軍已早抵北官渡署總兵勒伯勒東傷故後洋將賈忒勒繼之上年粵勇與洋兵構隙已深康國器所部多是粵勇用之紹興恐非所宜卽蔣益澧進規紹郡臣亦密屬其預飭諸將如與洋將共事惟守禮示信勿計功攘利致啟爭競之端所有連復六縣及見籌布置情形謹會同協辦大學士兩江總督臣會國藩閩浙總督臣耆齡恭摺馳奏伏乞

皇上聖鑒訓示謹 奏

同治二年二月十二日內閣奉

上諭左宗棠奏官軍連復武義永康等縣城一摺前據耆齡奏林

文察等軍攻克武義永康兩縣并東陽義烏等縣賊匪被擊潰竄情形業經明降諭旨宣示茲據左宗棠奏稱官軍攻克武義永康兩城後東陽義烏之賊聞風向諸暨一帶竄潰按察司劉典督率各營進徧浦江該處踞逆正思逃竄正月十八日劉璈等率所部馳至殺賊數百名追至離城五十里之白馬橋始行收隊當將浦江縣城收復劉典復督飭各營乘勢進徧諸暨分道進攻該處民團踴躍前導二十二日黃少春等督隊行至距城二十里地方出賊不意擒斬數百名賊敗入城官軍民團齊抵城下奮力圍攻城內餘賊千餘人窮蹙乞降官軍於二十三日整隊入城當將諸暨縣城收復其投誠之賊經劉典飭令薙髮遣散歸籍勦辦甚屬得手著左宗棠督飭劉典等軍迅卽乘此聲威將諸暨等處逸匪悉數殲除并會合閩軍進克紹興等城以靖地方欽此

議政王軍機大臣字寄同治二年二月十二日奉

上諭昨據耆齡奏到克復永康武義兩縣詳細情形當經明降諭旨宣示茲復據左宗棠奏官軍連復武義永康東陽義烏浦江諸暨等城一摺復經明發諭旨將各城收復情形宣示矣前經疊次寄諭耆齡左宗棠以浙境軍聲丕振勢成破竹卽當乘勢進取紹興先復浙東并令耆齡仍應駐紮浦城以防賊復竄由皖入江西滋擾令左宗棠仍當分兵嚴州以清皖境而顧全局見在金華賊竄赴諸暨後聞官軍將至復向義橋遁走自係回竄杭州其諸暨逸匪已回竄紹興著左宗棠飭令蔣益澧之軍乘勢進攻痛殲醜類速復紹城粵賊譚星一股由浦江敗竄爲李秀成之黨所阻

奏稿卷四

九

不敢回杭而竄桐廬卽著飭令劉培元迅率所部水師順流而下會同魏喻義所部合擊之以遏西趨左宗棠見在移軍蘭谿擬俟金華等處布置稍定卽親赴嚴州調度其劉典等軍仍須由嚴赴徽肅清皖南俾左宗棠無後顧之虞方能壹志進取所論甚合機宜著卽照所擬辦理昨據李鴻章等奏中外官軍進攻紹興之際耆齡所派兵官中槍陣亡洋將買忒勒繼之見當進攻紹興之際耆齡所派赴浙援剿之康國器一軍及閩粵各軍著卽飭令暫駐東陽縉雲一帶以壯蔣益澧後路聲援傳聞紹興已有克復之信各軍均屬在事出力自可同膺懋賞又聞上年粵勇與洋兵構隙頗深自當預爲防範毋令糅雜以致別滋事端并著該督撫密飭諸將與洋

兵共事總須守禮示信勿許計功攘利致啟爭競之端且爲外國人所竊笑也紹城克復及籌定戰守各情仍著隨時速奏將此由六百里各諭令知之欽此

奏稿卷四

漚陳餉項支絀片

同治二年正月二十七日

再臣軍餉銀軍火本省無從籌措支絀情形久已仰邀

洞鑒見因復地漸廣需兵愈多

臣

軍添募及臬司劉典所募新勇

合計四千有餘轉瞬到齊臺庫早空無以爲計此外尙須添造戰

艦雇募水師亦因經費無出暫未舉辦而見在各軍之餉積欠已

九箇月忍飢力戰雖未遽至譁潰而兵增餉絕大局堪虞計各省

奉

旨協撥之餉自上年正月起至十二月止連閏計算廣東每月十

萬兩除抵撥蔣益澧一軍行資十二萬兩僅收過釐餉十萬兩尙

欠一百零八萬兩福建自上年正月解過五萬兩以後每月三萬

奏稿卷四

三

兩僅收過十九萬兩尙欠十七萬兩湖北每月一萬兩僅收過三

萬三千四百兩尙欠九萬六千六百兩除湖南江西撫

臣於臣軍

餉事最肯關心解款撥項未經截算外其粵閩湖北等省積欠如

此之鉅在各該省或因動撥頻仍不無爲難之處然以浙省較之

緩急懸殊相應籲懇

天恩敕下廣東福建湖北將軍督撫迅速籌解大批以資接濟如

再逾延卽將各該省藩司從嚴參處其湖南江西兩省亦請

敕下以後仍須源源籌濟俾得拯此飢軍感荷

鴻慈實無旣極所有漚陳餉項支絀緣由謹附片具奏伏乞

聖鑒施行謹 奏

同治二年二月十二日內閣奉

上諭左宗棠奏兵增餉絀大局堪虞亟應速籌接濟以拯飢軍而利攻剿著官文嚴樹森文清耆齡徐宗翰晏端書黃贊湯迅速籌撥大批解赴左宗棠軍營以後仍著將各該省應撥協餉按月報解如再遲延卽由左宗棠將各該藩司從嚴參辦浙省軍務見在極爲得手儻因停兵待餉致誤戎機恐該將軍督撫等不能當此重咎也毛鴻賓沈葆楨於浙省軍餉頗能不分畛域竭籌協濟嗣後仍著該撫等源源報解以贍軍食是爲至要欽此

奏稿卷四

請將知府楊昌濬開缺以道員用片

同治二年正月二十七日

再浙江補用同知楊昌濬向在臣軍辦理營務上年九月奉

旨簡放衢州府知府臣因軍務喫緊仍暫畱營差遣未經飭赴新任見在金嚴克復事務倍繁而一切進止機宜及帶隊接仗非深明方略之員不足以資贊畫而利戎機該員此次克復各堅城勞績卓著可否仰懇

天恩俯准將楊昌濬開缺以道員畱於浙江補用俾臣得收指臂之助如蒙

俞允衢州府員缺卽請另行

簡放以重職守伏乞

奏稿卷四

聖鑒施行謹 奏

同治二年二月十二日內閣奉

上諭左宗棠奏請將知府開缺畱營升補等語浙江衢州府知府楊昌濬襄辦左宗棠營務尙屬得力著准其開缺畱營并以道員畱於浙江補用欽此

審辦龍游首逆片

同治二年正月二十七日

再龍游首逆陳廷香李國羣

臣

前次奏報業經官軍陣斬頃據蔣

益澧將李國羣并偽膺天義萬連勝燕天安陳其得文軍政司洪

薰義等押解前來

臣

詳加審訊據供陳廷香實經官軍在白龍橋

地方殺斃該逆等逃至湯溪官軍前後緊逼率其死黨乘間翻山

竄逸至蘭背源復遇參將化儒之軍阻截因下馬投降詭稱李懷

忠希圖免死其偽印偽令係交賊目蜚天福劉洪飛帶護同行已

經龍游追軍擒斬奪獲矣訊以賊中之事據供侍逆李世賢因上

年夏間與偽對王洪春元在浙江爭鬪洪逆歸訴金陵賊渠洪秀

全乘侍逆回時即將其鎖禁自上年九月以來并未接待逆偽文

奏稿卷四

十四

等語是金陵羣賊自相猜忌亦可概見

臣

查李國羣在賊中最高

悍鷙茲當勢窮力竭之時始乞命投降復詭易本名希圖免死與

尋常畏罪輸誠者有間自未便任其漏網惟連日搜獲逸犯甚多

應暫畱質認俟事畢即當處以極刑用申

國法其萬連勝陳其得兩犯從賊已久身面創痕宛然訊畢即予

正法梟示理合附片聲明伏乞

聖鑒謹

奏

議政王軍機大臣奉

旨知道了欽此

克復紹興桐廬府縣城池摺同治二年二月初四日會銜

奏為官軍克復紹興府城桐廬縣城見籌布置情形恭摺馳奏仰

祈

聖鑒事竊浦江諸暨等城經劉典攻克後逆賊何文慶率黨三千餘人由紹興竄至徑撲城下適高連陞熊建益已率所部於二十三日馳抵諸暨縣城當即督隊迎擊斃賊三四百名生擒數十名餘賊仍向紹興一路逃竄二十四日各營正擬移紮城外適東陽永康敗匪萬餘又紛紛竄至高連陞熊建益黃少春李耀南合兵縱擊大敗之殺賊近千名拔出難民數千奪獲旂幟器械無數劉典復率各營追至應店街斃賊數百名首梯戴三逆因官軍追躡

奏稿卷四

五

其後率黨由富陽西渡人多船重沿江溺斃者不計其數蔣益澧正飭劉清亮率五營繼進乘勢規取紹興適接高連陞等飛稟紹興府城已於正月二十六日經署提督葉炳忠等督甯波諸軍收復賊由臨浦義橋渡江而遁其桐廬地方先有賊目賴姓踞守復添紹興敗匪萬餘於沿江修築石壘勢頗猖獗二十八日劉培元派水師副將楊政謨率舢板師船駛往下游截獲賊船一號二十九日該逆見官軍無多悉眾來撲經楊政謨督隊奮擊燒燬賊船百餘號奪獲礮船數號民船廿餘號將沿江賊壘一律焚燬斃賊數千溺斃無數餘賊悉竄伏城中是夜楊政謨會合魏喻義所部陸軍併力圍攻遂將桐廬縣城克復臣維紹郡既克浙東郡縣已

一律肅清桐廬復克杭郡上游全爲我有劉典一軍追賊已抵富陽縣境當杭州之西南距省城僅八十里蔣益澧所部高連陞熊建益等已飭由臨浦義橋蕭山而前當杭州之南距省城亦不過百餘里若遂乘勝長驅杭州糧少城孤似亦無難速克惟粵逆譚星一股已與花旗賊合股由於潛昌化竄入皖南必將勾結太平石埭諸賊擾我後路臣前奏劉典一軍仍須由嚴赴徽爲肅清皖南之計者此也其僞戴王黃呈忠等逆聞已由富陽渡江意在與首逆李秀成合勢以犯江北查杭紹嘉湖均爲李秀成分地紹克杭危李逆或以此暫輟北犯之謀亦未可定臣見飭蔣益澧率所部全軍規取杭州臣所部除分駐金華外均隨臣進嚴郡而催劉

奏稿卷四

美

典一軍仍由諸暨浦江回嚴州以漸向皖南其劉典回湘新募之勇計此時已行過章門臣已飛飭江西廣信府暫行截畱聽候劉典隨時調遣以重江西邊圍之防劉典未回嚴州之先臣見檄劉培元率所部三營前赴開化縣之馬金街會合王德榜一軍相機截剿再由臣軍分撥入營扼紮淳安縣港口茶園以遏淳遂之衝一面檄飭各營勿貪克復省城之功冒進而忘大局勿憚江皖迂阻之勞就易而昧戎機將來杭州克復皖浙肅清臣擬籲懇

天恩毋論會否克復省城總以殺賊之多寡爲勞績之高下一體錄敘以昭獎勸庶人心競奮大局易就救平臣惟當慎以圖之以

求仰答

茲廬所有克復各城勞績最著之按察使劉典請

旨文部從優議敘擬保記名總兵副將熊建益楊政謨總兵銜副將黃少春副將楊芳桂黃有功效知府朱明亮均請

賞加勇號總兵銜副將劉清亮請交軍機處記名遇有總兵缺出請

旨簡放副將銜參將周廷瑞請以副將畱於浙江補用花翎遊擊鄧受福請以參將畱於浙江補用花翎都司銜守備徐文秀請以遊擊畱於浙江補用并均請

賞加勇號花翎都司李運榮請以參將補用并加副將銜藍翎都司翁桂秋請以遊擊畱於浙江補用并

奏稿卷四

七

賞換花翎都司銜花翎守備余朝貴請以遊擊畱於浙江補用藍翎守備賀國輝請以都司畱於浙江儘先補用并加遊擊銜

賞換花翎五品軍功記保千總張志公請以都司儘先補用并加遊擊銜

賞戴花翎記保千總丁賢發王宗元請以守備儘先補用并加都司銜

賞戴花翎五品軍功李世祥請以守備畱於浙江補用并加都司銜

賞戴花翎已革都司銜花翎守備王東林請開復原官以都司畱於浙江補用并加遊擊銜知府銜候選同知陳璠請以知府畱於

浙江補用并

賞加道銜同知銜湖南卽補知縣吳作梁請免補本班以直隸州知州仍歸湖南儘先補用并

賞加知府銜其餘出力員弁兵勇可否歸併克復金華等城案內從優保獎之處出自

天恩謹會同協辦大學士兩江總督臣曾國藩閩浙總督臣耆齡恭摺馳奏伏乞

皇上聖鑒訓示施行謹 奏

同治二年二月十九日內閣奉

上諭左宗棠奏官軍克復紹興桐廬府縣城池一摺浙江官軍自

奏稿卷四

奏

攻克浦江諸暨等城後逆匪何文慶率黨由紹興竄撲諸暨縣城經高連陞等率兵馳至督隊迎擊賊眾敗遁而東陽永康等處敗匪復紛紛竄至官軍合隊縱擊殺賊甚多救出難民千餘名奪獲器械無數劉典率各營追殺賊渡江逃遁溺斃不計其數乘勢規取紹興署提督葉炳忠等已於正月二十六日督甯波諸軍將紹興府城收復敗匪萬餘與桐廬踞賊合併沿江修築石壘圖抗官軍劉培元派令副將楊政謨率師船駛往下游賊悉眾來撲官軍奮力擊敗燒燬賊船百餘號奪獲賊船多隻沿江賊壘一律焚燬斃賊至數千名餘賊竄伏城中我軍水陸併力圍攻遂將桐廬縣城克復辦理甚爲得手仍著左宗棠飭令蔣益澧劉典各軍分道

進攻盡埽妖氛此次出力之浙江按察使劉典著交部從優議敘副將熊建益著賞給銳勇巴圖魯名號楊政謨著賞給壯勇巴圖魯名號黃少春著賞給強勇巴圖魯名號楊芳桂著賞給勤勇巴圖魯名號黃有功著賞給振勇巴圖魯名號知府朱明亮著賞給衝勇巴圖魯名號副將劉清亮著交軍機處記名遇有總兵缺出請旨簡放并賞給靖勇巴圖魯名號參將周廷瑞著以副將畱於浙江補用并賞給策勇巴圖魯名號遊擊鄧受福著以參將畱於浙江補用并賞給技勇巴圖魯名號守備徐文秀著以遊擊畱於浙江補用并賞給卓勇巴圖魯名號都司李運榮著以參將補用并賞加副將銜翁桂秋著以遊擊畱於浙江補用并賞換花翎守

奏稿卷四

元

備余朝貴著以遊擊畱於浙江補用賀國輝著以都司畱於浙江儘先補用并賞加遊擊銜賞換花翎五品軍功記保千總張志公著以都司儘先補用并賞加遊擊銜賞戴花翎記保千總丁賢發王宗元均著以守備儘先補用并賞加都司銜賞戴花翎五品軍功李世祥著以守備畱於浙江補用并賞加都司銜賞戴花翎已革花翎都司銜守備王東林著開復原官以都司畱於浙江補用并賞加遊擊銜同知陳瑤著以知府畱於浙江補用并賞加道銜湖南卽補知縣吳作梁著免補本班以直隸州知州仍歸原省儘先補用并賞加知府銜其餘出力員弁兵勇著左宗棠併入克復金華等城案內奏請獎敘該部知道所有攻克紹興府城詳細情

形仍著左宗棠查明具奏欽此

奏稿卷四

三

瀝陳浙省殘黎困敝情形片

同治二年二月初四日

再浙江此次之變人物彫耗田土荒蕪彌望白骨黃茅炊煙斷絕見屆春耕之期民間農器毀棄殆盡耕牛百無一存穀豆雜糧種籽無從購覓殘黎喘息僅屬者晝則緣伏荒畦廢圃之間擷野菜爲食夜則偃枕頽垣破壁之下就土由以眠昔時溫飽之家大半均成餓孥憂愁至極并其樂生哀死之念而亦無之有骨肉死亡在側相視而漠然不動其心者哀我人斯竟至於此臣於去冬會籌補救十二條刊發各屬見復籌採買豆穀種籽購辦耕牛招集鄰省農民來浙耕墾冀將來或有生聚之望惟浙省被難地方極廣巨富紳民早已避地遠徙捐無可捐臣軍之餉積欠太久日食尙艱雖所過地方每與各統領營官哨官共圖分食糞粥俵散錢米所獲賊中穀米亦酌量賑糶糲粥暫救目前然涓滴之施無裨大局且距新熟之期大遠災民朝不保暮難冀生全查有籍隸浙江之富紳楊坊俞斌毛象賢等十數員身擁厚資坐視邦族奇荒并無拯卹之意且有乘機賤置產業以自肥者爲富不仁莫此爲甚見飭盡力速措鉅款廣購米石運回辦賑以救阡危而昭任卹之誼理合將地方實在困敝情形附片陳明伏乞

皇上聖鑒訓示謹 奏

議政王軍機大臣奉

旨另有旨欽此

議政王軍機大臣字寄同治二年二月十九日奉

上諭左宗棠奏克復紹興桐廬浙東肅清并飭富紳措款辦賑沈葆楨奏浙東敗逆西趨派兵嚴防要隘各摺片已明降諭旨將肅清浙東出力之臬司劉典等從優獎勵矣前因浙東軍務得手杭城不難攻復第取之雖易守之甚難不如先清皖南剿辦較易得手曾經諭令曾國藩左宗棠妥籌辦理此次左宗棠摺內所陳乘勝長驅杭城無難速克惟逆首譚星一股已由於潛昌化竄入皖南必將句結太平石埭諸賊擾我後路偽戴王黃呈忠等聞已由富陽渡江欲與李秀成合勢北犯見飭蔣益澧規取杭州而催劉典一軍回嚴以向皖南并飭劉培元率所部三營前赴開化會合

奏稿卷四

三

王德榜全軍相機截剿又分撥入營扼紮滄遂之衝各等語所籌與前旨大略脗合卽著照所議妥爲辦理至檄飭各營勿貪克復省城之績勿憚江皖迂阻之勞將來總以殺賊之多寡爲勞績之高下尤屬洞中窾要并著隨時策勵各軍迅奏膚公同膺懋賞見在浙東敗賊竄入績溪并句結大股聚於石埭意圖西趨劉典一軍旣已赴徽援剿江西廣信尚可無虞惟該逆若橫竄建德則與饒九等處接壤不可不豫爲之防沈葆楨已飭段起等嚴扼景鎮湖口并令韓進春偵賊所向迎頭截擊卽著督飭該員等嚴密防剿毋稍疎虞浙江此次之變吾民顛沛流離千里赤地朝廷軫懷民瘼哀憫殊深左宗棠見擬散錢煮粥拯救飢民招集流亡給資

耕種具見該撫能體朝廷德意惠我烝黎而富紳楊坊俞斌毛象  
賢等十數員非但膜視邦族不加拯卹且欲乘機賤置產業實屬  
忍心害理爲富不仁著照左宗棠所擬飭令富紳楊坊等力措鉅  
款廣購米石迅救卹危如敢不遵卽行嚴辦沈葆楨奏遵保賢員  
一片著畱中將此由六百里各諭令知之欽此

奏稿卷四

浙江初次米捐援例請

獎摺

同治二年二月十三日

奏爲浙江初次米捐援例請獎仰祈

聖鑒事竊於同治元年七月二十六日奉

上諭左宗棠奏請援照湖北米捐減成章程收捐一摺浙江軍務方殷左宗棠添募各軍陸續可到需餉實屬浩繁著准其按照湖北米捐減成章程收捐凡浙江紳商之流寓各省者准其一體捐輸其江西湖南兩省業經由部頒給執照者著自奉旨之日爲始由各該省藩司查照減成新例填給執照其有并非籍隸浙江情願捐輸者亦准一例照辦并著戶部再行發給各項職銜及貢監生等執照五千張迅速由驛遞至浙江交左宗棠接收餘著照所

奏稿卷四

四

議辦理該部知道欽此臣遵卽檄委江西藩司李桓委用道沈元泰於江西省城設局勸辦并遴員分赴廣信饒州等處勸諭一體捐輸茲據江西藩司李桓等詳稱江西省局共收過折色銀二萬四百七十兩合捐例銀四萬九千四百四十兩浙江代辦藩司蘇式敬詳稱各局共收過折色銀八萬九千五百十七兩合捐例銀十七萬九千三十四兩均已隨時解到臣軍廣信糧臺支發兵餉并據開具各捐生姓名請獎前來臣細加覆覈捐數均屬有盈無絀除捐虛銜封典各員已填給執照咨部註冊外其捐實職之豐應齡等七十六員合無仰懇

天恩敕部覈給獎敘以昭激勵理合繕列清單恭呈

御覽伏乞

皇上聖鑒施行謹 奏

議政王軍機大臣奉

旨戶部覈議具奏單併發欽此

奏稿卷四

三

請將初次米捐照常覈

獎片

同治二年二月十三日

再臣於同治元年十二月二十七日准戶部咨開同治元年十一月初七日內閣奉

上諭捐輸章程除雲南貴州兩省准其照常收捐其餘報捐京外文武各官止准捐足三班其分發指省銀兩應歸京銅局上兌及各項捐復人員一併令其赴京呈交銀兩尙屬可行均著照所議辦理欽此臣自應欽遵辦理惟浙省米捐自上年七月奏准之後卽委員分赴江西湖南各處勸辦所捐銀兩俱已隨時解交臣軍廣信糧臺支發兵餉上年秋冬之間臣軍得以勉強敷衍者僅賴此涓滴之入見在部議新章外省不准指捐分發原爲籌備京餉

奏稿卷四

奏

起見部臣籌畫之苦臣豈不知惟是捐輸事例愈推愈廣原以示簡便而速招徠前此各處捐生往往報捐數年始赴京引

見驗看故雖事例頻開減成不止一案而羣情樂其便利尙復爭趨若必概以到京指捐分發之例相繩恐該捐生因道途遼遠觀望不前外省既苦勸辦之艱京局亦難收挹注之效臣擬嗣後浙省米捐仍聽各捐生指捐分發將所收指捐分發折色銀兩隨案聲明俟湊成鉅款由臣委員或解京銅局或解戶部彈收伏候諭旨遵行至初次米捐內所收指省分發銀兩均在未奉

諭旨之前合無仰懇

天恩俯念浙省情形與他省不同准將此次米捐均照常覈獎俟

二次再將指省分發銀兩另款報解是否可行伏乞  
聖鑒訓示施行謹 奏

議政王軍機大臣奉

旨著照所請戶部知道欽此

奏稿卷四

是

水陸各軍攻勦大勝見籌辦情形摺

同治二年二月二十五日

奏爲水師進攻富陽陸軍防勦皖南克獲大勝見籌辦情形仰

祈

聖鑒事竊桐廬旣克杭州上游關鍵祇富陽縣一城而浙江自桐廬七里瀧以下地勢漸平江面漸闊縣城背江面山右阻一溪形勢完固賊自踞杭後於此修築城壘雉堞一新當官軍克復桐廬之時杭屬新城之賊蕭山之賊均棄城鼠竄併聚於此踞杭之賊亦以前年所奪戰船溯流上拒臣飭水師營官副將楊政諱都司羅啟勇等先率所部師船前往察看形勢二月初六日楊政諱師船自桐廬擊楫而下遙見賊船數百號排列城下前後均有礮船

奏稿卷四

奏

護之遂傳令師船作兩層排齊疾進頭隊繞向南岸直攻其中俟賊礮船上犯則我後隊師船應之百礮齊轟江流鼎沸火箭噴筒迸注賊船頃刻延燒殆徧賊之礮船復爲我後隊師船擊敗其從前官軍之被賊偏脅者以其礮船來投羅啟勇亦適帶所部師船駛至遂併受之返礮轟擊賊大慌亂遂併棄船入壘官軍亦上岸蹙之踏平堅壘二座殺賊甚多奪獲旂幟槍礮無算日暮收隊而還計是役焚賊船數百號奪礮船十數號民船數十號斃賊約以千計楊政諱等卽駐營富陽城南岸徧之見在蔣益澧將臨浦義橋一帶布置略定卽飭高連陞熊建益馳赴富陽蔣益澧亦率後隊繼進見已由南岸渡江臣飭魏喻義率所部由桐廬前進適與

之合探報有賊約數千自杭城來援見擬先剿援賊以忱之如富陽堅城不可驟拔擬卽飭蔣益澧分兵助魏喻義扼要立營以綴城賊而自率所部由富陽而下以撼杭城再由嚴州撥兵駐新城護以師船以遏賊援而通餉運此見在攻富陽規杭城之情形也其屯踞皖南之賊約有三起一爲胡黃古賴諸逆卽踞甯國太平石埭旌德者也一爲花旂賊此股係廣東無賴匪徒前年由廣東湖南江西入浙皖者也人數最多無甚伎倆爲金陵賊黨所不齒時尾賊後游行掠食蹤迹靡常一爲賊首譚星卽前踞蘭谿抗官軍者也此股自蘭谿敗竄浦江諸暨經劉典及各營躡蹤緊追直至富陽江邊其黨除殺斃溺斃及解散外存者不及三分之一臣

奏稿卷四

堯

於正月二十七日奏報連復武義永康東陽義烏浦江諸暨等縣城摺內卽言劉典一軍仍須由嚴赴徽爲肅清皖南之計其時譚逆尚止竄近桐廬見亦趨併皖南矣太平石埭之賊時窺黟縣祁門邊界二月初一初二等日經分駐漁亭之總兵丁長勝副將王明輝等擊敗之初十日賊從藍湖米坑而來將窺祁門北界布政使銜新授江西吉南贛甯道王文瑞飭郭德馨楊海泰羅瑞山喻勝榮等迎擊之半途卽與賊遇郭德馨怒馬衝入賊中連斫賊數十後隊奮威衝殺賊大敗潰官軍躡蹤緊追比近藍湖賊復回拒藍湖之左有數賊張蓋騎馬突出麾羣賊向前迎敵郭德馨馳斬其一各勇丁挺矛刺之數賊俱殲餘賊翻山竄逸適喻勝榮羅瑞

山從兩路馳至痛加截殺與郭德馨合隊緊追過米坑十餘里沿途賊屍枕藉約共斃賊千餘生擒七十餘內有僞軍政司蘇四達黃齊升美天福張北湖被天福張小滿賜天燕易明高僞丞相王大吉謙天福鍾有朋等賊目十數名其墮崖落澗死者則無數可紀也奪獲擡鳥槍百數十杆旂幟三百餘面刀矛無數騾馬十三匹有此一戰胡古兩逆之勢頓衰祁黟當可無事惟休徽之賊日聚日多似花旗之賊已經合併而譚星一股聞已由昌化過千秋關竄徧徽州徽防官軍紛紛告警計劉典一軍此時亦已由威坪至屯溪臣又飭其催新募之勇由廣信趨婺源機勢湊拍或可力過奔衝此見在攻剿皖南一路之情形也規杭郡可以經賊竄擾

奏稿卷四

單

江北之謀剿皖南可以遏賊突犯江西之路爲大局計卽所以爲浙計臣惟有勉竭駑鈍慎以圖之以求仰紓慈廩所有兩路獲勝情形謹據實奏報伏乞

皇上聖鑒訓示施行謹 奏

議政王軍機大臣奉

旨另有旨欽此

請調京員并多掣本年卽用知縣來浙片

同治二年二月二十五日

再浙省軍務吏治需才孔亟上年奏調各員有來浙者有因他省咨畱未能赴浙者見在復地日廣差委乏員茲查有戶部候補員外郎顧菊生安詳練達畱心幹濟湖南在籍戶部主事謝寶鏐志趣甚正饒有才識湖南在籍內閣中書吳士邁才品優長辦事勤懇可否仰懇

天恩將該員等發往浙江交

臣

差遣按照資階酌量改補外職再

本年癸亥

恩科會試取中貢士有應分發各省以知縣卽用者并懇

敕下吏部於定例分發外多掣十數員來浙俾得隨時察看訓勉

奏稿卷四

里

委署序補是否有當伏乞

訓示施行謹 奏

同治二年三月十四日內閣奉

上諭左宗棠奏浙省軍務吏治需材孔亟請調京員赴浙差委并請將卽用知縣之本科進士多掣十數員赴浙等語戶部候補員外郎顧菊生湖南在籍戶部主事謝寶鏐內閣中書吳士邁均著發往浙江交左宗棠差遣委用并著吏部於本科進士引見後將卽用知縣人員於定例分發外多掣十數員分發該省以資差委  
欽此

議政王軍機大臣字寄同治二年三月十四日奉

上諭左宗棠奏水師進攻富陽陸軍防剿皖南獲勝并沈葆楨奏  
江省官軍連日在休甯縣境截剿獲勝各一摺浙省官軍剿賊得  
手羣賊鼠竄恆欲由皖南就食江西見在太平石埭之賊時窺黟  
縣祁門邊界爲總兵丁長勝等軍擊敗并經道員王文瑞等各軍  
於藍湖米坑等處痛加截殺胡古兩逆之勢已衰祁黟可以無事  
惟休甯尙未解圍徽境之賊日聚日多據左宗棠奏稱花旗之賊  
業經合併而譚星一股亦已由昌化過千秋關竄徧徽州與沈葆  
楨摺內所稱同知王沐等於巖寺等處擊走之賊皆爲花旗廣匪  
正相符合草市地方旣爲休婺藩籬王沐等所部僅二千人防剿

奏稿卷四

聖

殊形單薄此次雖由屯溪一路疊次擊賊獲勝尙足以固軍心仍  
著沈葆楨督飭該文武等實力嚴防毋稍鬆懈不得以甫經獲勝  
致或疎虞爲賊所乘劉典一軍據沈葆楨奏已由威坪抵大川口  
經左宗棠復飭其催新募之勇由廣信以趨婺源是已繞出賊前  
機勢湊拍定能力遏奔衝以解休甯之圍江省信防足資穩固卽  
著左宗棠督飭劉典等乘機妥辦并與江省官軍隨時聯絡互爲  
防剿以全大局桐廬旣克杭州上游關鍵祇富陽一城業經左宗  
棠飭令水師大加轟擊并踏平其江岸堅壘軍聲日振著卽飭令  
蔣益澧所部之高連陞等及魏喻義等軍水陸會合將自杭來援  
之賊擊斷進拔堅城或令蔣益澧分軍自率所部由富陽下撼杭

城以規杭郡卽可綴賊竄擾江北詭謀均著左宗棠相機辦理另片奏請調顧菊生等各員本日業經明降諭旨允准惟由外補一節須俟各該員到浙後由該撫察看隨時奏明請旨此時未便概行照准恐致效尤而生奔競衢州府屬雖未失陷而鄉村半遭蹂躪殊可矜憫昨經明降諭旨一體蠲免二年漕糧以蘇民困將此由六百里各諭令知之欽此

奏稿卷四

查明紹興蕭山克復詳細情形摺

同治二年二月二十五日

奏爲查明紹興蕭山克復詳細情形恭摺具奏仰祈

聖鑒事竊紹興府城於正月二十六日克復業經臣奏明在案茲

據護提督葉炳忠甯紹台道史致諤等稟稱中外官軍進攻紹興府城自達耳地福陣亡後葉炳忠添派外國師惠南及王維圻所帶常安軍王錫馴所帶定勝軍馳往援剿疊獲勝仗正月十九二十兩日蕭山義橋臨浦一路竄來援賊復經張景渠督率中外各軍攻剿一勝於下方橋再勝於安昌擒斬多名嗣是英國總兵哇樂德克復由滬解來大礮稅務司日意格調來法國洋兵陸續到營急擬乘勢環攻適逆黨楊應柯密遣難民持信赴張景渠營中

奏稿卷四

四

乞降願爲內應二十五夜城中火起張景渠約會各軍齊進首逆周姓率眾開稽山門向蕭山而遁官軍一面追剿一面登城當於二十六日已刻將紹興府城收復其蕭山之賊聞官軍躡蹤追至亦於初二日棄城潰走經守備張其光遊擊李光等收復竊維浙事之轉以金華爲一大關鍵金華未復之前甯波各軍力攻紹興未能猝拔迨十三日復金華二十三日復諸暨二十六日紹興卽隨之而下見在浙東肅清規取杭垣自宜由富陽前進而東路亦未可鬆防除蔣益澧所部高連陞熊建益已取道進規富陽蔣益澧督隊繼進其蕭山臨浦一帶已飭葉炳忠張景渠督紹興各軍嚴爲防守義橋仍暫由蔣益澧分兵扼紮所有克復紹興蕭山詳

細情形理合據實馳陳伏乞  
皇上聖鑒訓示施行謹 奏

議政王軍機大臣奉

旨覽奏均悉欽此

奏稿卷四

壹

查明法國參將陣亡請

卹摺

同治二年二月二十五日

奏爲查明法國參將打仗陣亡懇

恩優卹以昭激勸事竊據甯紹台道史致諤稟稱上年勒伯勒東傷故後法國參將權受中國副將職任達耳地福卽買忒勒來甯接帶該營兵勇十二月二十四日英國總兵咭樂德克親運大礮到營籌剿紹郡賊匪比商進兵之策張景渠議分攻稽山五雲昌安三門達耳地福咭樂德克議攻西郭門張景渠恐有疏失飭各軍分路接應本年正月初一日咭樂德克達耳地福帶領洋兵花綠頭各勇車輪大礮徑攻西郭門王維圻帶常安軍攻昌安門謝國恩帶信義軍攻五雲門張景渠楊叔懌督隊由南路兜剿圍攻

奏稿卷四

吳

竟日轟坍西門城堞丈餘至酉刻始收隊還初二日復攻西郭門連開洋礮轟塌城垣十餘丈斃賊無算達耳地福獨立橋上揮兵登城該逆拌死抵拒正相持間突有黑洋人五六十名助賊施放洋槍彈入達耳地福腦左登時殞命同時陣亡外國兵頭一人洋兵四人勇丁二十餘人帶重傷者數十人次傷者百餘人等因前來伏查達耳地福自上年八月到甯管帶花頭黃頭兩隊勇丁教練洋槍防守餘姚剿退各鄉逆股上虞之捷亦與有力此次經該國提督伏恭派委接帶勒伯勒東舊部抵營未及一月忠義奮發恭謹有加茲以急攻紹城身先士卒臨陣捐軀實堪憫惻合無仰

懇

天恩將法國參將權受中國副將達耳地福照副將例從優議卹  
其一切身後事宜已飭甯紹台道史致諤照華爾勒伯勒東例妥  
爲辦理其中外亡傷兵勇應給賞卹養傷銀兩亦并飭史致諤查  
明分給以示矜恤所有法國參將打仗陣亡緣由理合恭摺具奏  
伏乞

皇上聖鑒訓示施行謹 奏

議政王軍機大臣奉

旨已有旨將達耳地福照總兵陣亡例從優議卹矣欽此

甯波新關經費請作正開銷摺

同治二年二月二十五日會銜

奏爲浙江甯波新關經費請作正開銷并洋稅折耗銀兩仍援照江海關海關章程銷算恭摺奏祈

聖鑒事竊照甯波海口自咸豐十年十一月開設新關一切章程均查照江海關辦理上年八月甯紹台道史致諤抵任後臣卽飭其將海關應行事宜分別核辦茲據詳稱江海關每年關署關卡共須經費銀六千五百餘兩今甯波新關徵收稅數雖遠遜於上海而額設書役巡扞各有專責未便概裁應減作銀三千八百八十兩八錢請於洋稅項下作正開銷又每年新關房租銀一千二百六十兩鎮海房租銀五十兩北卡房租銀三十兩均請暫行作

奏稿卷四

吳

正開銷俟起建關屋卽行停止又外國司稅人等薪俸工食等項查江海關奉總理衙門頒發定章每月給銀二千零五十兩今每月樽節銀二千兩由司稅分別給發又甯波新關銷算洋稅折耗銀兩咸豐十一年經戶部奏駁飭照三口通商例每兩祇准開銷折耗銀一分二釐查從前浙海關徵收洋稅成色低潮因爲數無多折耗銀兩卽由關道賠補見江海關海等關旣奉部覆每兩准銷折耗銀二分此次甯波開設新關亦係照章辦理事同一律應請援照江海關海關成案按所收洋稅銀數每兩准銷折耗銀二分自咸豐十年十一月關期起在於徵收各國洋稅銀兩內作正開銷如有不敷仍由關道賠補以示限制等因具詳請奏前來

臣

覆核無異理合會同閩浙總督臣耆齡恭摺具奏伏乞

皇上聖鑒施行謹 奏

議政王軍機大臣奉

旨該衙門覈議具奏欽此

奏稿卷四

晃

另設夾板巡船經費請於洋稅項下開銷片

同治二年二月二十五日

再據甯紹台道史致諤詳稱甯波開設新關徵收洋稅各商船從鎮海縣之招寶山進口距甯波海面六十里支港紛歧商船沿途每多偷漏是以設立大號巡船二隻中號巡船二十隻自鎮海口門至甯波港分段梭巡惟招寶山外沿海各口均屬浙界如象山縣之象山石浦等口鎮海縣之穿山新楔小港等口慈谿縣之蟹浦口以及乍浦澈浦温台各屬海口岸均係不准通商之口而各商船私往貿易不特違犯定章且於關稅大有虧損該道函商司稅另設夾板大船一隻雇募外國巡丁選派精壯水手專巡浙江沿海不通商口岸以嚴洋禁惟此項丁役辛工飯食軍火月需銀三百餘兩加以修葺添配經費每年共約需銀五千餘兩一時無款可籌擬請於洋稅項下每年支銀六千兩專爲沿海口岸巡查之費如開銷不及六千仍歸還洋稅項下以示限制等因前來

臣體察沿海情形添設巡船實不可少除飭該道嚴密稽查外理合附片陳明伏乞

聖鑒謹 奏

議政王軍機大臣奉

旨該衙門知道欽此

奏稿卷四

五

請 敕江蘇道員郭嵩燾督辦松所鹽務片

同治二年二月二十五日

再浙江餉源以鹽務爲大宗所有行鹽引地上自徽州廣信下及松江共設三十六場分隸杭紹嘉松四所除杭嘉引地尙未規復紹所亦甫離兵燹商竈星散正課虛懸應俟妥籌辦理外惟松所引地如上海最稱旺銷其華亭婁縣南匯奉賢金山等縣亦一律肅清銷數自曷乃各場大使并不將每年應納鹽課窳課若干新舊草蕩沙蕩實額若干及連年所徵窳課錢糧解交何處據實稟報其意存欺隱可知非委明幹大員嚴爲釐剔不足以除夙弊而濬利源見在浙江無員可委且隔省查辦呼應不靈惟見任江蘇蘇松常鎮太道郭嵩燾勤懇篤實公正廉平與臣生同里間最所深悉以之督辦松所鹽務可資整飭又新授金華府知府徐寶治聞其人尙謹飭堪令隨同郭嵩燾經理可否仰懇  
皇上天恩俯念浙餉甚絀急須籌措敕下江蘇撫臣轉飭郭嵩燾兼督松所鹽務出自

鴻慈謹附片請

旨

同治二年三月十四日內閣奉

上諭左宗棠奏請敕江蘇道員督辦松所鹽務等語浙江鹽務惟松所引地最稱旺銷見在所屬之華亭等處早經一律肅清據該撫稱各場大使并不將每年應納各課新舊蕩額及連年所徵

竈課錢糧據實稟報其爲意存欺隱已可概見著派蘇松糧道郭  
嵩燾妥爲經理督同金華府知府徐寶治就近將松所引地查明  
務使各項弊端逐一釐剔以重鹺務而裕餉源欽此

奏稿卷四

遵保克復嚴郡出力弁兵紳勇摺

同治二年二月二十五日

奏爲遵將克復嚴州府城出力弁兵紳勇請

旨獎敘以勵戎行事竊臣於同治元年十二月二十三日欽奉十

二月初八日

上諭左宗棠奏官軍攻克嚴州府城一摺其餘出力弁兵紳勇著准其擇尤保奏欽此臣遵卽恭錄行知見署嚴州府知府補用道魏喻義飭將在事弁兵紳勇除前次已經隨摺奏獎外其餘實在打仗出力者核實查明毋許冒濫茲據彙詳請獎前來臣覆核無異可否仰懇

天恩俯准將單開各員給予獎敘出力稍次者由外記名咨部註

奏稿卷四

三

冊以昭激勸理合開列清單恭呈

御覽伏乞

皇上聖鑒施行謹 奏

同治二年三月十四日內閣奉

上諭左宗棠奏遵保克復嚴州府城出力之弁兵紳勇開單請獎一摺浙江賊匪竄踞嚴州府城經該各員弁實力進攻同心殺賊當將嚴州府城克復尙屬著有微勞自應量予鼓勵所有單開各員均著照所請獎敘該部知道單併發欽此

請 賞還已革臬司原品頂帶片

同治二年二月二十五日

再已革浙江臬司段光清於咸豐十年奉

旨暫緩拏問責令帶罪自效嗣因克復江山常山縣城經前撫

臣

王有齡奏請免其拏問

臣

入浙後訪聞該革員前在浙江由州縣

洊擢監司政聲素著輿論翕然因卽飭令前赴甯波會同甯紹台

道史致諤辦理善後諸事續令赴滬勸辦浙籍捐輸該革員抵滬

後勸諭甯紹等屬紳商共捐銀二十餘萬兩除已捐未繳及解過

甯波洋銀六萬九千圓外親解

臣

軍庫平銀六萬兩前來當此軍

餉乏絕之際得此一款暫資敷衍軍心稍固

臣

已飭該革員總辦

浙江捐輸兼理上海鹽茶絲捐事務以觀後效可否仰懇

奏稿卷四

壽

天恩賞還該革員原品頂帶以示鼓勵之處出自

聖裁又紹興克復浙東肅清應設立鹽茶專局以便抽收釐稅查

有分發浙江試用道葉熊才具優長知顧大局

臣

見飭其辦理浙

紹鹽茶局務冀於餉事有裨合併陳明伏乞

聖鑒訓示施行謹 奏

同治二年三月十四日內閣奉

上諭左宗棠奏勸辦捐輸之已革臬司可否賞還頂帶等語已革

浙江按察使段光清經左宗棠派赴上海勸辦浙籍紳商捐輸見

已集有成數先後解過甯波洋銀六萬九千圓左宗棠軍餉銀六

萬兩尚屬著有微勞并據左宗棠奏稱訪聞該革員前在浙江政

聲素著輿論翕然段光清著賞還原品頂帶以示鼓勵其已捐未  
繳之款并飭迅速提解清楚以濟軍食餘著照所議辦理欽此

奏稿卷四

五

